

UMUSI MPUZAMAKUNGU WAHARIWE IBINYABUZIMA
Ijamba rishikirijwe n'Umushikiranjanji w'Amazi, Ibidukikije,
Amatongo n'Itunganywa ry'Ibisagara
Kuwa 22 Rusama 2011

Ir. Jean-Marie NIBIRANTIJE

=====

Barundi Barundikazi,
Ncuti z'Uburundi

Uyu musu igenekerezo rya 22 Rusama umwaka 2011, Uburundi bwaramutse bwifatanya n'ayandi makungu kugira buhimbaze umusi mpuzamakungu wahariwe ibinyabuzima. Uyu musu ukaba wahariwe «*Ibinyabuzima bigizwe n'amashamba*». Ico civugo kikaba gihuriranye n'uko Ishirahamwe Mpuza Makungu (ONU) wahariye mwaka 2011 «*Umwaka w'amashamba*». Uyu musu rero ukaba akaryo turonse kugira twibaze, dukubitize agatima mpembero ku kamaro amashamba afise mu gukingira ibindi binyabuzima n'akamaro afituye abantu, haba mu vyo ubutunzi, imibano n'akaranga kacu.

Uburundi, nkuko musanzwe mubizi, n'igihugu gito cane mugabo kikaba gifise amashamba atari make. Twotanga akarorero ku mashamba yo ku misozi ihanamiye nk'ikibira, amashamba ya Bururi na Monge. Ayo mashamba akaba arenza amahegitari arenga ibihumbi mirongo itanu. Ubwoko bw'ibiterwa biri musu ayo mashamba birenga 1000 n'ibikoko vyinshi, harimwo mbere n'ibinyabuzima bitaboneka ahandi kw'isi. Ni naho mbere dusanga ubwoko bw'inkende burenga 5 harimwo *Imamfu* dusanzwe tuzi ko ari igikoko kigeramiye kw'isi yose, mugambo gisanze ari karuhariwe mugukwega Ingezi.

Mu Bumanuko bw'igihugu naho, turafise ishamba rya Kigwena hampande y'ikiyaga Tanganyika, na ya mashamba y'ingongo yo ku mitumba ihanamiye ikiyaya, kuva mu Rumonge gushika Inyanza-Lake, akabandanya mu Kumoso gushika i Gisagara mu ntara ya Cankuzo aho bayita amashamba y'imituntu n'imitwana. Ntitwokwiyibagiza kandi rya shamba ry'I Gihanga rigizwe n'urukoko atahandi ruri kw'isi atari mukigaya ca Rusizi, aho ibiterwa bishika 1000 bimaze gutohozwa n'abahinga.

Mu Busereko bw'Uburundi, turafise kandi Amashamba ry'ibiti bito bito dusanga mu karere gakingiwe ka Ruvubu. Ako Karere gakingiwe karenza amahegitari 50000 akaba ari co cibare gikuru c'igihungu kirimwo ibikoko vyinshi cane nk'imbugo zirenga 2400, impongo n'indonyi nyinshi.

Mu Buraruko, mu ntara ya Kirundo, hariho udushamba tw'utugunda atahandi turi mu Burundi atari i Murehe gusa.

Turetse ayo mashamba cimeza, Uburundi burafise kandi ibikumba vy'imikaratusi, vy'amapinusi, n'amakaritrisi kurugero rw'amahegitari 120000, biteragiye ku mitumba ihanamiye.

Barundi Barundikazi,
Ncuti z'Uburundi

Ayo mashamba yose y'igihugu afise akamaro ntangere mu vy'ubutunzi, imibano n'akaranga. Amashamba yo ku misozi ihanamiye arafasha mu kugwiza no mu kuminina amazi no mu kugwanya inkukura. Ivyo bigatuma turonka amazi yo kuvomera isi ndimwa nko mu kiyaya c'Imbo eka no mu mirambi ishashe. Ayo mashamba arakinga handi imyuzurira n'itosekara ry'amazi yo mu nzuzi no mu kiyaga Tanganyika.

Turazi kandi ko umuyagankuba n'ibikorwa vy'iterambere biwukomokako biva ku ngomero z'amazi atangwa n'amashamba. Aha twovuga urugomero rwa Rwegura ku ruzi Gitenge rutanga umuyagankuba ku bice 50 kwi 100 ku wo Uburundi bwose bukoresha. Akabongera kava kw'ishamba n'imvura igwiriye mu Kibira bituma hari imirima myinshi y'icayi n'amahinguro atari make akorera mumucungararo yaco.

Mu Bumanuko bw'igihugu, amashamba ahanamiye ikiyaya c'Imbo arakingira ikiyaga Tanganyika kugira ntigitosekazwe n'inkukura n'imyuzurira. Ivyo bigatuma n'Uburomvyi buguma bwifashe neza, mugihe abarovyi batari bake bamaze kubika ingashiro mu maja ruguru y'ikiyaga aho amashamba yo gukinga inkukura yamaze guhona.

Hampande y'ako kamaro, amashamba asanzwe atanga vyinshi vya nkenerwa ku banyagihugu. Twotanga akarorero ku miti y'ikirundi, ku biti n'ivyatsi bikoreshwa mu vyo akaranga, nki ngagi, imigano, amatete n'urukoko bikorwamwo ibitari bike, ubwoba n'ivyamwa biribwa, eka mbere n'ibindi. Ivyo vyose bigatuma abanyagihugu biyungunganya bikabateza imbere.

Barundi Barundikazi,
Ncuti z'Uburundi

Naho bigaragara ko amashamba adufitiye akamaro, ibinyabuzima birageramiye mu Burundi bwose. Ivyo rya ry'ibiti ryatumwe amashamba menshi ahona kurugero 9 kwi 100 mu mwaka. Bigatuma rero ibiti biterwa birutwa n'ibicibwa. Ibituma haba iyicigwa ry'ibiti navyo ni nk'ibi :

- Ubukene bw'inkwi n'ibiti vyo kubwaka ;
- Ukwagurira indimo mu mashamba, barondera ahakimera ;
- Imiriro ya nyakanga.

Imiriro yatumye mbere uturere tutari duke tuba ubugaragwa bw'amabuye. Ntitworeka kandi gutunga urutoko kw'itanga ry'amashamba ngo bayakoreremwo iyindi mirimo canke kuyubakamwo bidaciye mu mategeko, bikaba bituma amashamba atituka kurugero runini cane.

Iryo tituka rero ry'amashamba ryatumye ubwoko bwinshi bw'ibikoko n'ibiti bihona, ibindi bikaba bisigaye kurugero ruto cane. Si ivyo ibeshere, mu Buraruko, udushamba tw'utugunda n'imyonga y'urufunzo biriko birahona kubera uburimi mugihe tuzi ko ayo mashamba n'imyonga bifasha cane mukugumya akanovera k'isi muri ako karere gasanzwe kabangamirwa cane n'uruzuba.

Mu Bumanuko, ibangamirwa ry'ishamba rikingiwe rya Mukungu Rukambasi rizotuma haba inkukura ku musozi, itosekara ry'amazi n'ihona ry'amafi, y'ikiyaga Tanganyika. Mu Burengero, amashamba akingiwe yo mu kiyaya ca Rusizi arabangamiwe cane n'uburimi hamwe n'iyaguka ry'igisagara ca Bujumbura. Mu Buseruko naho, ugutema imirira, imiriro ya nyakanga n'ugukanya imyonga ya Malagarazi na Rumpungwe biguma bititura amashamba.

Izo ngorane zose zerekeye ihonywa ry'amashamba zirafise inkomoko nyamukuru, arizo zizi :

- Itwaro itabereye muvyekeye ibidukikije;
- Irwirirana ry'abantu;
- Ubukene bw'abanyagihugu n'ubwo igihugu nyene.

Biragaragara cane ko itituka ry'amashamba ritagwa n'intwaro itabereye mugutunganya amashamba. Ivyo bikiyerekanira mukudakwirikiza amategeko araba ibidukikije, bigatuma haba uruhagarara muvyekeye amatongo. Twovuga kandi uburyo bwo gukingira amashamba cimeza bubuza abanyagihugu gushikira ivyankenerwa biri ahakingiwe.

Igwirirana ry'abantu riratumye naryo nyene amashamba ahona. Irwirirana ry'abantu rigafatira ku migendo y'abarundi ngo abana n'Itunga. Twese ubu turazi ko amatongo yaze gushika aho urugo rumwe rurimwo abana 6 n'abavyeyi babo, baba bafise igice c'ihigitari canke kidashika, kugira babeho. Ibiharuro bitwerekana kandi ko abarundi bazoba ari imiriyoni 14 mu myaka itarenga cumi; ivyo bikazotuma amatongo yaga cane, ubukene bukuyongera, amashamba nayo akazohahonera.

Barundi Barundikazi, Ncuti z'Uburundi

Ico kibazo c'itituka ry'amashamba camye kiraza ishingira Uburundi. Ni naco gituma igihugu cacu cateye igikumu ku Masezerano Mpuza Amakungu araba Ibinyabuzima mu mwaka 1997. Ivyo bigatuma rero Uburundi buronka intumbero yo gukingira, gukoresha neza ibinyabuzima n'ukugabangana inyungu zibivamwo ata wandya wangura. Mugushira mungira ivyo vyose, Uburundi bwaratunganije Umugambi Ngenderwa werekeye Ibinyabuzima.

Haheze indwi z'itatu gusa Uburundi bwemeje itegeko rishasha riraba uturere dukingiwe rigashimikira kuri ibi bikurikira:

- Gushinga intwaro isangiwe na Leta n'abanyagihugu mu gutunganya uturere dukingiwe;
- Guha uburenganzira abanyagihugu mu gushikira ivya nkenerwa biri ahakingiwe;
- Gushinga ibikorwa vy'iterambere mu banyagihugu begereye ahakingiwe.

Leta y'Uburundi ihejeje kandi kwemeza itegeko rishinga imbibe z'amashamba akingiwe ya Mpotsa, Monge, Akarere gakingiwe ka Bugesera, Gisagara, Makamba, Karera na Nyakazu, tutibagiye na rya shamba rinini rya Ruvubu.

Muri iki gihe, Uburundi buriko burategura icegeranyo cerekeye uturusho kugira amashamba ashobore gukingirwa neza. Bubifashijwemwo n'ishirahamwe Mpuzamakungu riraba Iterambere (PNUD) hamwe n'Ikigega Mpuzamakungu kiraba Ibidukikije (FEM), Uburundi bugiye vuba gutanguza umugambi wo gukingira ikibira n'ishamba rikingiwe rya Ruvubu.

Uburundi kandi bugiye kubandanya umugambi wo guteragira ibiti ku mitumba no mu ndimo. Tukaba twihaye intumbero yo kutoreza imivyo ingana n'umuriyoni yo gutera ku mitumba ihanamye.

Barundi Barundikazi, Ncuti z'Uburundi

Naho Uburundi bumaze kurangura ibitari bike, intabwe iracari ndende mugukingira Amashamba. Ni naco gituma twateguye kunagura wa Mugambi Nyamukuru werekeye Ibinyabuzima. Tukazoshimikira k'ugushinga imigambi y'ibikorwa vyo gukingira Ivyatsi n'ibiti cimeza n'ibirimwa, imisozi ihanamye no m'ugushiraho amategeko araba ibinyabuzima biri muguhona, ibinyabuzima bicuruzwa mu mahanga bivuye mu gihugu cacu, eka n'ibinyabuzima biva hanze. Tuzokomeza ubushakashatsi kugira twame dukwirikirana igihe cose ingene ibinyabuzima vyifashe.

Igihugu cacu kiriyemeje kandi gushinga Icegeranyo c'Igihugu kiraba amashamba ateragiwe n'ukwigisha hose ingene abanyagihugu batunganya bonyene ivyerekeye ayo mashamba.

Kugira ivyo vyose tubishire mu ngiro, birakenewe ko Abarundi bose babihagurukira. Turateye akamo Abanyagihugu bose, Abajejwe Intwari, Ibisata vya Leta, Abikorera utwabo, Amashirahamwe yigenga, abanyamitahe, Abafasha Uburundi, ko bofasha Leta y'uburundi mu gukingira Amashamba.

Murabona ko twegereje igihe c'ici. Mukaba muzi ko ari igihe kigoye kubera irwirana ry'imiriro ya nyakanga. Mbonyeho rero gutera akamo abarundi bose, Abatwara abandi, Amashirahamwe yose ko twohagurukira rimwe tukarwanya bimwe biboneka imiriro ya nyakanga. Twifuza ko uyu mwaka ata muriro wovugwa mu Burundi bwose.

Ndaginje rero iri jambo nshimira abantu bose, amashirahamwe yose yama yitanga mugufata mu mugongo Uburundi mu bikorwa vyerekeye gukingira ibidukikije, cane cane ibinyabuzima biri mu mashamba.

Murakoze